

فريق التفريغ بموقع الطريق إلى الله
يقدم
من دورة "مع القرآن في رمضان"
اللقاء الخامس من تفسير سورة الروم
(باللهجة المصرية)



لفضيلة الدكتور: أحمد رمضان
رابط المادة:

السلام عليكم ورحمة الله وبركاته

الحمد لله الذي هدانا لهذا وما كنا لنهتدي لولا أن هدانا الله، اللهم انفعنا بما علمتنا وعلمنا ما ينفعنا وزدنا علماً، أحبتي في الله حلقة جديدة وجميلة ومشوقة ومفيدة للبحث عن اليقين من خلال أسرار وجود سورة الروم.

عش بالتسبيح مع كل آية

وقفنا المرة اللي فاتت عند قول الله عز وجل - "فَسُبْحَانَ اللَّهِ حِينَ تُمْسُونَ وَحِينَ تُصْبِحُونَ * وَلَهُ الْحَمْدُ فِي السَّمَاوَاتِ وَالْأَرْضِ وَعَشِيًّا وَحِينَ تُظْهِرُونَ" الروم 17: 18، وكأنها رسالة من القرآن عش مع التسبيح، عش بالتسبيح مع كل آية، مع كل نعمة، مع كل موقف، مع كل حدث، شوف النبي صلى الله عليه وسلم - يرى أحد الصحابة يتمتم، يبحرك شفايفه، فقال له ماذا تفعل يا أبا أمامة؟

قال أذكر الله عز وجل - يا رسول الله، فقال له رسول الله صلى الله عليه وسلم "أفلا أخبرك بأكثر أو أفضل من ذكرك الليل مع النهار والنهار مع الليل؟.." قال بلى يا رسول الله فقال له: "سبحان الله عدد ما خلق، سبحان الله ملء ما خلق، سبحان الله عدد ما في الأرض والسماء، سبحان الله ملء ما في السماء والأرض، سبحان الله ملء ما خلق، سبحان الله عدد ما أحصى كتابه، و سبحان الله ملء كل شيء" حسنه ابن حجر العسقلاني، وكأنه يقول على كل نجمة، على كل بجرة، على كل شجرة، على كل ورقة، على كل قطرة مطر قل سبحان الله.

معجزة دورة الحياة والموت

"يُخْرِجُ الْحَيَّ مِنَ الْمَيِّتِ وَيُخْرِجُ الْمَيِّتَ مِنَ الْحَيِّ وَيُخْبِي الْأَرْضَ بَعْدَ مَوْتِهَا ۗ وَكَذَلِكَ تُخْرَجُونَ" الروم: 19، "يُخْرِجُ" من اللي بيخرج؟ الله - سبحانه وتعالى - زي ما قلنا القرآن بيستخدم المعلومات اللي انت شايفها، اللي انت عارفها، اللي انت عايش معاها، بيستخدمها عشان يربط قلبك بالله عز وجل -، عشان يوصلك للإيمان واليقين اللي احنا بندور عليهم "يُخْرِجُ الْحَيَّ مِنَ الْمَيِّتِ"، دورة الحياة، دورة معجزة، دورة مبهرة، دورة عجيبة في كل لحظة، بل في أقل لحظة، بلايين الأشكال من الحياة، بلايين الأشكال من الموت، في كل لحظة برعم أخضر صغير ييفلق حبة، ييفلق نوايا، "إِنَّ اللَّهَ فَالِقُ الْحَبِّ وَالنَّوَى" الأنعام: 95، يخرج إلى الحياة، في كل لحظة جنين في رحم أم، حيوان أو إنس أو في

بيضة الله - عز وجل - يأمر - سبحانه وتعالى - فتدب فيه الروح، في كل لحظة ورقة شجر خضرا تخرج من غصن، ثمرة تُخرج من الأكمام سبحانه الله **"إِلَيْهِ يُرَدُّ عِلْمُ السَّاعَةِ ۗ وَمَا تَخْرُجُ مِنْ ثَمَرَاتٍ مِنْ أَكْمَامِهَا وَمَا تَحْمِلُ مِنْ أُنْثَىٰ وَلَا تَضَعُ إِلَّا بِعِلْمِهِ ۗ"** فصلت: 47، سبحانه.

الحياة لغز كبير

الحياة لغز كبير، العلماء احتاروا يعني إيه حياة، يعني إيه حاجات شايفنها بتتحرك ومش حية، الحيوانات المنوية حاجات بتتحرك وفيها طاقة وبتروح وبتيجي ولها رحلة معينة وشايلة، العلماء بيقولوا عليها ميتة، حياة وموت سر من أسرار الله، **"وَيَسْأَلُونَكَ عَنِ الرُّوحِ ۗ قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا"** الإسراء: 85، الفيرس ده حاجة ممكن تعيش ملايين السنين ميتة وفجأة ينشط يحتل الخلية يسخر الجسم كله عشانه، سبحانه الله، سبحانه ربي، فالحياة، وفي نفس الوقت الموت؛ كل ورقة شجرة بتقع، كل جسم بيتحط في التربة بيتحلل يتحول لغازات، يتحول لمعادن، التربة تمتصها يطلع نبات جديد، يطلع ثمار الأحياء تستفيد منه، دروة عجيبية، دورة غريبة، بيقولك في كل ثانية 125 مليون خلية من جسم الإنسان بتموت، في كل ثانية! وفي نفس الوقت 125 مليون خلية بتتولد في كل ثانية، في كل لحظة.

بحث عن معجزة الحياة والموت

قرأت بحث جميل أوي لأستاذ دكتور أورام في جامعة المنصورة بيتكلم عن معجزة الحياة والموت، هو الراجل بيتكلم في تخصصه فيقولك أي خلية بتتولد معاها كود انتحار، كود تدمير ذاتي، في وقت معين لازم الخلية تدمر نفسها وتحلل والخلايا اللي حوالها تمتصها، تاكلها وتمتصها وتستفيد منها نتيجة بقى إشعاع، نتيجة تلوث، نتيجة أي حاجة، الخلية تيجي عند الوقت المحدد ده وتأي، ترفض إنها تتدمر وبعدين تبدأ تنتقل لعضو آخر وتتحول لخلية سرطانية، يبدأ بقى القصة دي

فالموت دورة زي ما الحياة بالظبط دورة، سبحانه ربي، دورة غريبة **"يُخْرِجُ الْحَيَّ مِنَ الْمَيِّتِ وَيُخْرِجُ الْمَيِّتَ مِنَ الْحَيِّ وَيُخَيِّبُ الْأَرْضَ بَعْدَ مَوْنِهَا ۗ"** الروم: 19

ياالله شوف منظر الأرض!

"وَمِنْ آيَاتِهِ أَنْكَ تَرَى الْأَرْضَ خَاشِعَةً" فصلت: 39، **"وَتَرَى الْأَرْضَ هَامِدَةً فَإِذَا أَنْزَلْنَا عَلَيْهَا الْمَاءَ اهْتَزَّتْ وَرَبَّتْ وَأَنْبَتَتْ مِنْ كُلِّ زَوْجٍ بَهِيحٍ"** الحج: 5، أرض سوداء، أرض صخرة، شجرة ميتة، شجرة عريانة، فجأة كده ييجي الربيع تلاقى الشجرة بقت ألوان وأشكال، والأرض بقت ألوان وأشكال ومذاقات وطعوم

"وَفِي الْأَرْضِ قِطْعٌ مُتَجَاوِرَاتٌ وَجَنَّاتٌ مِنْ أَعْنَابٍ وَزُرْعٌ وَنَخِيلٌ صِنْوَانٌ وَغَيْرُ صِنْوَانٍ يُسْقَىٰ بِمَاءٍ وَاحِدٍ وَنُفِضَلُ بَعْضُهَا عَلَىٰ بَعْضٍ فِي الْأَكْلِ" الرعد: 4، مهرجان، بانوراما أشكال وألوان ومذاقات وطعوم، ده النوع الواحد يعني البرتقال بس فيه كم نوع برتقال، ده مفيش برتقالة شبه الثانية سبحانه الله لافي شكل ولا في لون ولا في طعم، سبحانه ربي، بانوراما سبحانه الله.

معجزة خلق الإنسان من تراب

"وَكَذَلِكَ نُخْرِجُونَ" الروم:19، موضوع بسيط خالص، موضوع أسهل ما يمكن، حاجة إنت بتشوفها بعينك في كل لحظة وفي كل ثانية، موت و حياة ومن حي يخرج ميت، ومن ميت يخرج حي سبحان الله "وَكَذَلِكَ نُخْرِجُونَ * وَمِنْ آيَاتِهِ أَنْ خَلَقَكُمْ مِنْ تُرَابٍ ثُمَّ إِذَا أَنْتُمْ بَشَرٌ تَنْتَشِرُونَ" الروم 19: 20، "وَمِنْ" دي سموها تبعضية يعني من بعض آياته، والآية يعني الدليل والبرهان يعني من بعض آيات أو دلائل قدرته وعظمته ورحمته -سبحانه وتعالى- في الكون "أَنْ خَلَقَكُمْ مِنْ تُرَابٍ"، الإنسان البدوي البسيط زمان، اتنوا بتقولوا الإنسان مخلوق من تراب، عشان بنشوفه، لما الإنسان بيحطوه بعد ما يموت بيتحول لتراب وشايف الإنسان يياكل من تراب؛ الزرع والنبات، كل ده من تراب "فَلْيَنْظُرِ الْإِنْسَانُ إِلَىٰ طَعَامِهِ * أَنَا صَبَبْنَا الْمَاءَ صَبًّا * ثُمَّ شَقَقْنَا الْأَرْضَ شَقًّا * فَأَنْبَتْنَا فِيهَا حَبًّا * وَعَبْنًا وَقَضْبًا * وَزَيْتُونًا وَنَخْلًا" عبس 24: 29، كل ده طالع منين؟ طالع من التراب لما تقولي الإنسان معمول من تراب يصدق.

الإنسان في العصر الحديث اكتشف إن كل عناصر جسم الإنسان موجودة في التراب يعني الإنسان لو حللته يطلع لك 3 مسامير صلب على مش عارف لوح كالسيوم، على زنطين دهون وبروتينان هو ده الإنسان، ده الإنسان شوف بقى الإنسان من تراب، فرق شاسع، شتان تراب ميت ساكن حقير ملوش ثمن، ملوش قيمة إزاي يبقى نطفة.

الإعجاز في جسم الإنسان

-النطفة دي السم الواحد من ماء الرجل فيه

أكثر من 50 لـ 300 مليون حيوان منوي ده السم الواحد زي ما قلنا المرة اللي فاتت جبت قارة بحالها وحطتها في سم وكل واحد له صفات غير التاني، الحيوان المنوي الواحد الـ DNA بتاعه فيه أكثر من 5000 صفة وراثية؛ لون الشعر وشكل الجلد والطباع والمزاج، إعجاز "هُوَ الَّذِي خَلَقَكُمْ مِنْ تُرَابٍ ثُمَّ مِنْ نُطْفَةٍ ثُمَّ مِنْ عَلَقَةٍ ثُمَّ يُخْرِجُكُمْ طِفْلًا" غافر:67.

- إزاي التراب ده بقى طفل بيعيط

له ودان ومناخير وإيدين وأعضاء وعضلات إزاي؟ معجزة "وَمِنْ آيَاتِهِ أَنْ خَلَقَكُمْ مِنْ تُرَابٍ ثُمَّ إِذَا أَنْتُمْ بَشَرٌ تَنْتَشِرُونَ" الروم:20، "تَنْتَشِرُونَ" إزاي التراب ده بقى مخ، بقى دماغ فيها ملايين ملايين الخلايا العصبية، فيها مراكز إدراك، مراكز ذاكرة، تشوف واحد أو تكلم واحد مجرد بس يقولك ألو عرفت هو مين، تشوف منظر تفتكره بعد 20 سنة، وتصور وتحيل وتحليل واستنتاج وحل معادلات وإنجاز ومذاكرة إزاي؟ سبحان الله.

- إزاي التراب ده بقى عضم

كل عضم لها شكل هندسي، ولها طبيعة معينة ووضع معين وغضاريف وأربطة ومفاصل وسائل مانع للاحتكاك ومحاور ارتكاز، إزاي؟! ده جوه العضم ده مصانع انتاج الدم، مصانع انتاج الكرات الحمراء، كل ثانية يقولك كل ثانية العضم

يبتلع 2.5 مليون كرة دم، سبحان الله، سبحان ربي، إزاي؟!، إزاي التراب ده بقى، طب، إزاي العضلات بتتنقبض وتتنبسط وتتحرك، فيه عضلات إرادية وعضلات غير إرادية، يقولك قلب الإنسان ده لو واحد عنده 60 سنة يعني عما يكون عاش 60 سنة يعني قلبه ضخم دم يعني حوالي يملا مساحة طولها 1000 م في الـ 60 سنة والشرايين والأوعية وكل خلية بل كل شعرة لها شريان ولها وريد ولها كرات دم ويوصلها أكسجين ويخرج منها نواتج التغذية، الاحتراق سبحان ربي، سبحان الله. إزاي؟!

- شوف البلعوم ده اللي عامل زي بتاع المرور

معجزة إن إزاي التراب ده، الحبة الطين، إزاي الصلصال، إزاي الماء المهين ده بقى قلب، بقى دماغ، بقى عضم، شوف البلعوم بتاع الإنسان بيبقى عامل زي عسكري المرور وانت قاعد تتكلم يقفل شوية عشان الهوا مش عارف إيه، هتاكل، يقفل القصبه الهوائية عشان الأكل ما يدخلش، طب وانت نائم وعايز تبلع ريقك سبحان ربي

- إزاي حبة التراب دول بقت جلد

تخيل انت إنسان عايش من غير جلد، تخيل الإنسان عضلات وأعصاب وعضم وحش، ربنا -سبحان وتعالى- إداله جلد جميل وجسم جميل ومش حاجة ميتة ده حاجة حية، بيعس الساقع والسخن والناعم والخشن والملمس سبحان ربي، سبحان ربي.

لا بد من شكر هذه النعم

كل خلية آية، كل خلية معجزة بس الإنسان يتفكر، كل نعمة ربنا -سبحانه وتعالى- ادهالنا -سبحانه وتعالى- رد فعلها لازم بحاجتين:

- أول حاجة الشكر

الشكر على النعمة سواء بقى باللسان، سواء باستعمال النعمة دي في طاعة ربنا -سبحانه وتعالى- أي حاجة في الدنيا رد فعل طبيعي إنك إنت تستدل بالنعمة دي على المنعم -سبحانه وتعالى- كل حاجة سبحان الله، حبة السكر دول لو مسكتهم كده وحببت تحرقهم مش هيتحرقوا إلا عند درجة 100، طب إزاي بيتحرقوا جوه الجسم، إزاي الجسم بيعرق السكر اللي إنت بتاكله، الأنسولين المادة الوحيدة اللي تحرق السكر عند درجة حرارة 37 التوازن انت عشان تقف مش هقولك تلعب كورة ولا هتجري ولا تركب عجلة انت بس عشان مجرد تقدر تقف يعني لما يجوبوا مثلاً يوقفوا مانيكان أو تثال لازم يعملوا له قاعدة وتبقى 70% من ثقله تحت والقاعدة دي 70 سم أو 90 سم، تخيل بقى واحد بيعرب كورة ويلعب كورة وييلعب جومباز وبينط عقله ويتركب عجلة وييمشي على الحبل، إيه ده؟! سبحان الله

"ثُمَّ إِذَا أَنْتُمْ بَشَرٌ تَنْتَشِرُونَ" الروم:20 كل ده غير بقى الانطباعات والمواهب وده واحد مش عارف عامل إزاي وده اهتماماته كلها بالدنيا وده اهتماماته بالمناصب، كل ده جه من التراب إزاي، كل ده جه من الماء المهين إزاي؟! ده جه

من الصلصال أو من الحمأ المسنون ده إزاي، إزاي سبحانه الله، إزاي التراب ده يبقى إنسان يخترع الكاميرا اللي إحنا قاعدين قدامها ويخترع الطائرة ويخترع الموبايلات والنت والاتصالات، سبحانه ربي!

نعمة التزاوج بين الذكر والأنثى

"وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا" الروم:21، من اللي خلق؟ سبحانه الله "وَمِنْ آيَاتِهِ" أي من بعض آياته "خَلَقَ لَكُمْ مِنْ أَنْفُسِكُمْ" كان ممكن التناسل والتكاثر الإنسان زي النبات كده مثلاً، الفرد الواحد فيه الذكورة وفيه الأنوثة، ممكن تقطع صباغك وتحطه في محلول يبقى إنسان، ممكن مش عارف إيه إنما ربنا من رحمته -سبحانه وتعالى- خلّى فيه تزاوج، خلّى فيه رحمة، خلّى فيه مودة،

شوف الفرق الرهيب بين هو وهي، هو خنشور وبعضلات وبشعر ومخ ومش عارف إيه، وهي قوارير زي ما سماها النبي -صلى الله عليه وسلم- وهي صغيرة كانت دائماً تمسك العروسة وتسرحلها وتعملها مش عارف إيه وهو عايز يلعب بالمسدس ويضرب سبحانه ربي، شوف الفرق الرهيب وشوف في نفس الوقت التوافق الرهيب، الأنس والرحمة والمودة، الإشباع العاطفي والجسدي والعصبي والروحي اللي بين الرجل والمرأة، حاجة لا توصف فعلاً حاجة لا توصف، الكيمياء اللي بين الرجل والمرأة لا توصف

نعمة جعل المودة والرحمة بينهم

"وَجَعَلَ" هو اللي جعل "بَيْنَكُمْ مَوَدَّةً وَرَحْمَةً" الروم:21

- المودة

مش بس حب، يعني إظهار الحب يعني كلمة حلوة، وردة، خروجة جميلة، هدية، كدبة، الأكلة دي الله تسلم إيديك، مباح الكذب مباح في الحرب وفي الحاجات دي، الله ما شاء الله ربنا يبارك فيك وتسلم إيديك، إظهار المودة

-والرحمة

كبرت بقى وبقت كركوبة وشعرها وقع أو مركبة طقم وهو مش قادر ورجله مخلعة ونائم طريح الفراش، فيه رحمة يحنوا على بعض يتسندوا على بعض، من اللي عمل كل ده؟ الله -سبحانه وتعالى-، لا بشهادات ولا بمنصب ولا بعفش ولا بالفلل، سبحانه الله تلاقي واحد وواحدة هي جميلة ودكتورة وبنت ناس وغنية وهو ما يتعيش، حاجة كده وجايلها فيلا وسبحان الله ربنا ينزع من بينهم المودة والرحمة وتلاقي مشاكل وطلاق بدون سبب، بدون أي سبب واتنين تانيين يعني وتلاقي بينهم سبحانه الله مودة ورحمة، بسبب بقى إطلاق بصر، بسبب بقى معاصي، بسبب إغلاق، سبحانه ربي "إِنَّ فِي ذَلِكَ لآيَاتٍ لِقَوْمٍ يَتَفَكَّرُونَ" الروم:21.

نعمة خلق السماوات والأرض

"وَمِنْ آيَاتِهِ خَلْقُ السَّمَاوَاتِ وَالْأَرْضِ" الروم:22، السماوات والأرض دي لفظ قرآني للتعبير عن الكون، عن الجرات والكواكب والأرض بقى الكهوف والجبال والأنهار والمحيطات والبحار، سبحانه الله، تقريباً الحجر بعيدة عن الأرض 16

ألف مليون سنة ضوئية، السنة الضوئية دي يعني المسافة اللي بين الكواكب، المقدار والمسافة اللي بيقطعها الضوء في سنة، الضوء بيقطع في الثانية الواحدة 300 ألف كيلو، يعني تضرب بقى 300 ألف كيلو في الثانية، تضربها بقى في 60 عشان تحولها لدقيقة، تضربها في 60 للساعة تضربها في 24 مليون، تضربها في 365 عشان تحولها لثانية فده بقى 60 ألف مليون سنة ضوئية، يقولك أقرب نجم للأرض لو حبيت تروح بعريية، عريية بي إم ولا مرسيدس ماشية على 200 توصلها في 50 مليون سنة، سبحان ربي، سبحان ربي

نعمة اختلاف الألسنة والألوان

"وَمِنْ آيَاتِهِ خَلْقُ السَّمَاوَاتِ وَالْأَرْضِ وَاخْتِلَافُ أَلْسِنَتِكُمْ وَأَلْوَانِكُمْ" الروم: 22، ألسنة بقى والألوان دي معجزة، كل البشر دول أصلهم واحد وشوف بقى تنوع اللغات وفيه يعني آلاف اللغات، ده الهند لوحدها مش عارف 300 لغة، حتى هنا في مصر لو شفت اتنين وهما بيتكلموا مش هتفهم وانت هتتعد سبحان ربي، إختلاف رهيب، غير بقى نبرات الصوت، اكتشفوا إن كل إنسان من 5 مليار بني آدم اللي عايشين على وجه الأرض دول، فيه بصمة صوت مفيش اتنين صوتهم زي بعض، في بصمة قرنية أو شبكية، في بصمة DNA، في بصمة بلازما، في بصمة ريحة الجلد، ريحة الجلد بتاعة الإنسان دي بصمة مفيش إنسان شبه التاني في البصمات دي كلها، سبحان ربي.

هذه النعم آيات للعالمين

"وَاخْتِلَافُ أَلْسِنَتِكُمْ وَأَلْوَانِكُمْ إِنَّ فِي ذَلِكَ لآيَاتٍ لِّلْعَالَمِينَ" الروم: 22، أو للعالمين على قراءة، للعالم "إِنَّمَا يَخْشَى اللَّهَ مِنْ عِبَادِهِ الْعُلَمَاءُ" فاطر: 28، أو للعالمين لأي إنسان يتدبر متحضر، ريفي، دكتور، العامل البسيط، سبحان ربي، فاستخدم الحاجات هتعرف، وقيل لأعرابي من البادية: بم عرفت ربك؟ فقال: الأثر يدل على المسير، والبصرة تدل على البعير، فسماء ذات أبراج، وأرض ذات فجاج، وبحار ذات أمواج، ألا تدل على السميع البصير؟، الإمام أحمد قال عن البيضة، "هذا حصن حصين أملكس له باب وليس له منفذ، ظاهره كالفضة البيضاء وباطنه كالذهب الإبريز فينما هو كذلك إذا انصدع جداره فخرج منه حيوان سميع بصير ذو شكل حسن وصوت مليح"، "أَلَا أَلَهُ مَعَ اللَّهِ" النمل: 63.

نعمة الليل والنهار والبرق

"وَمِنْ آيَاتِهِ مَنَامُكُمْ بِاللَّيْلِ وَالنَّهَارِ وَابْتِغَاؤُكُمْ مِّنْ فَضْلِهِ" الروم: 23، النوم دي قوانين تانية خالص ممكن واحد بيتنعم، واحد تاني بيتعذب في النار وهو نائم، "إِنَّ فِي ذَلِكَ لآيَاتٍ لِّقَوْمٍ يَسْمَعُونَ" * وَمِنْ آيَاتِهِ يُرِيكُمُ الْبَرْقَ خَوْفًا وَطَمَعًا" الروم 23: 24، الإنسان بكل ما هو وصل إليه من علوم وتقدم وتكنولوجيا ومهارة وقوة وذكاء، في حاجات كده معينة، الظواهر الطبيعية البرق والفيضانات والإعصار تلاقي الإنسان واقف عامل زي الفار المبلول، عامل زي الفار اللي واقف جوه المصيدة لاحول له ولا قوة، أمريكا إعصار جاي قريب كده من السواحل بتاع أمريكا تلاقي خسائر مادية واقتصادية وخسائر في الأرواح طب فين الصواريخ وفين حاملات الطائرات وفين المارينز، سبحان الله، خايف مرعوب، الطمع؛ نفسه يعرف، نفسه يفهم سبحان الله.

نعمة قيام واستمرار السماء والأرض بأمره

"وَيَنْزِلُ مِنَ السَّمَاءِ مَاءً فَيُحْيِي بِهِ الْأَرْضَ بَعْدَ مَوْتِهَا إِنَّ فِي ذَلِكَ لَآيَاتٍ لِّقَوْمٍ يَعْقِلُونَ * وَمِنْ آيَاتِهِ أَنْ تَقُومَ السَّمَاءُ وَالْأَرْضُ بِأَمْرِهِ ۗ" الروم 24: 25، قيام السماوات والأرض، ثبات السماء، الاستمرار البقاء، من أسماء الله - عز وجل - القيوم يعني القائم بنفسه المقيم لجميع خلقه إيجاباً وإعداداً وإمداداً، إيجاباً: خلقهم الله من عدم سبحانه وتعالى، إعداداً: أعد كل شيء لوظيفته، خلق "سَبِّحِ اسْمَ رَبِّكَ الْأَعْلَى * الَّذِي خَلَقَ فَسَوَّى * وَالَّذِي قَدَّرَ فَهَدَى" الأعلى 1: 3، "أَعْطَى كُلَّ شَيْءٍ حَلْفَهُ ثُمَّ هَدَى" طه: 50، سبحانه وتعالى،

ودي بقى أصعب، إنت ممكن تعمل شركة ناجحة، ممكن تعمل برنامج ناجح بس الاستمرار أصعب بكثير جداً من إن انت في البداية، فالثبات، الاستمرار "إِنَّ اللَّهَ يُمَسِّكُ السَّمَاوَاتِ وَالْأَرْضَ أَنْ تَزُولَا ۗ وَلَئِن زَالَتَا إِنْ أَمْسَكَهُمَا مِنْ أَحَدٍ مِّن بَعْدِهِ" فاطر: 41، بالقوانين والسنن اللي ربنا - سبحانه وتعالى - حطها لثبات الأرض، احنا قاعدين والعلماء بيفتنوا أعمارهم عشان يكتشفوا نظرية، وفي الآخر ينسبونها للعالم، يقولك مش عارف النسبية ينسبونها لأينشتين، طيب هو أينشتين اللي اخترعها؟ مجرد إنه اكتشفها، مين اللي خلقها؟ من اللي خلاها سنة كونية، في ثبات الأرض؛ الجاذبية والكهرومغناطيسية، كل نظرية انت بتدرسها، كل معادلة انت بتدرسها دي سنة من سنن الله - عز وجل - في ثبات وقيام الأرض "وَقَالُوا اتَّخَذَ اللَّهُ وَلَدًا ۗ لَدَا ۗ سُبْحَانَهُ ۗ بَلْ لَّهُ مَا فِي السَّمَاوَاتِ وَالْأَرْضِ ۗ كُلُّ لَّهُ قَانُونَ" البقرة: 116. خاضعون مستسلمون لمشيئة الله وقدرته.

رسالة لكل كافر وكل عاصي

أيها الكافر العاصي ده متمرده على التكليف بس هو حقيقة هل يقدر يتحكم في قلبه، نقطة الدم اللي ماشية في مخه دي يقدر يتحكم فيها؟ ده في عالم اسمه استيفن هاون مشهور بييجي على الناشيونال جيوجرافيك عامل بقى أفلام وثائقية ومش عارف إيه وبتاع، هو أصلاً قاعد على كرسي مشلول مين اللي بيدخله الحمام ومين اللي بيأكله، ده انت نفسك آية، ده انت لوحده كده معجزة، إذا كان انت بكل العلم اللي وصلت له والإمكانات اللي بتعمل بها أفلامك مش قادر تمشي نقطة الدم اللي عملت لك شلل في جسمك، إنت ذات نفسك آية، سبحان له "كُلُّ لَّهُ قَانُونَ" البقرة: 116.

كل ذلك هين على الله

"وَهُوَ الَّذِي بَدَأَ الْخَلْقَ ثُمَّ يُعِيدُهُ وَهُوَ أَهْوَنُ عَلَيْهِ" الروم: 27، زي ما كنا بناخد في الرياضيات كده وهو المطلوب إثباته، هي سهلة وبسيطة وبديهية وجميلة "وَهُوَ أَهْوَنُ عَلَيْهِ" الروم: 27، "أَوَلَيْسَ الَّذِي خَلَقَ السَّمَاوَاتِ وَالْأَرْضَ بِقَادِرٍ عَلَىٰ أَنْ يَخْلُقَ مِثْلَهُمْ" يس: 81، "وَضَرَبَ لَنَا مَثَلًا وَنَسِيَ خَلْقَهُ ۗ قَالَ مَنْ يُحْيِي الْعِظَامَ وَهِيَ رَمِيمٌ * قُلْ يُحْيِيهَا الَّذِي أَنْشَأَهَا أَوَّلَ مَرَّةٍ ۗ وَهُوَ بِكُلِّ خَلْقٍ عَلِيمٌ" يس 78: 79، سبحان الله

ولله المثل الأعلى

"وَلَهُ الْمَثَلُ الْأَعْلَىٰ فِي السَّمَاوَاتِ وَالْأَرْضِ" الروم:27، كل القرآن اللي بنقوله ده ربنا بيقولك إيه بمحاول لمستواك، يعني كل الكلام ده من بعض آياته ده ممكن عالم واحد يفني عمره كله في دراسة مش عارف أو عالم تاني عايش حياته كلها عشان يعرف هجرة فراشة معينة، فكل ده إنما الله -عز وجل- له المثل الأعلى، سبحانه وتعالى، لاتدركه الأذهان - سبحانه وتعالى-، حي لايموت، قيوم لايموت -سبحانه وتعالى-، "وَلَهُ الْمَثَلُ الْأَعْلَىٰ فِي السَّمَاوَاتِ وَالْأَرْضِ ۗ وَهُوَ الْعَزِيزُ الْحَكِيمُ" الروم:27.

الخاتمة

كانت رحلة جميلة أوي، كانت رحلة شيقة وممتعة مع المجلات والكواكب والأقمار والمشاعر والحب والرحمة جزاكم الله خيراً، سبحانك اللهم وبمحمدك، أشهد أن لا إله إلا أنت أستغفرك وأتوب إليك.

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>